



**Uunga siunnersuut: Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allangortinnera pillugu Inatsisartut inatsisaat (Silap pissusianik pissuteqartumik ajornartorsiornerne ajunaarnersuarnullu assingusuni pisuni aallarteqqinnissamut tapiissutisisinnaaneq, akiliutigineqartartut qaffanneri kiisalu qinnuteqarnermi piffissaliussat eqqunneqarneri)**

(Aalisarnermut Piniarnermullu Naalakkersuisoq)

## **Siullermeenera**

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allangortinnera pillugu Inatsisartut inatsisaattut siunnersuut Naalakkersuisut sinnerlugit Aalisarnermut Piniarnermullu Naalakkersuisup saqqummiusnaanut imatut Naleqqamiit oqaaseqaateqassaagut.

Inatsimmut allannguutissatut siunnersuut saqqummiunneqartoq inatsisartut 2023-mi ukiakkut ataatsimiinnerminni UKA2023 immikkoortoq 62-imut tunngatillugu inuussutissarsiuteqartut aallarteqqinnissamut tapiiffigineqartarnerat pillugu inatsisip allannguutissaanik Naalakkersuisut suliaqaqqullugit aalajangiiffissatut siunnersuummut akuersissuteqarsimanerinek inatsit una aallaaveqartoq suliarineqarmat taamanikkut Naleqqamiit allannguutissamik siunnersuutigisimasarput saqqummiuteqqissallugu tulluarsoraara.

“Innuttaasunut, aalisartut, piniartut savaatillillu inuussutissarsiorlutik ingerlatsinerminni silap allangoriartorneranut siuarsaanissamut nammineq aningaasarsiornissaannut iluaqutaasumik siuarsaanissamik aningaasaateqarfimmik Naalakkersuisut Aningaasanut Inatsimmi kontumik nutaamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut”.

Taamatut allannguutissatut siunnersuuteqarnermi aallaavigaarput pitsaanagerusutut isigigatsigu aningaasarsiorfissanik inuit nammineersinnaanerat aallaavigalugu ikiorsiissutissanik qinnuuloorfissaannarnillu pilersititsiinnaratik inuit aningaasarsiornissaminnut



attartorfigisinnaasannik periarfissanik pilersitsiortorutta pitsaanerusutut aqutissiorutta inuit imminut napatittut pilersortullu pilersinnissaat pitsaanerummat ikiuutaannarnik qinnuuloorfissaannarnik killilersugaaqisunik aammalu qinnuteqarfigineqaraluarlutik itigartitsiffiusaannartunik peqarunnaarluta.

Inuit aalisagartugassaanik tuneerartutut pinnagit inuit aalisaatissaanik aalisagartassaanik tunitsivissaannik aammalu atortunik pisinissamat attartorfigisinnaasaanik aqutissiuineq pitsaanerungaarmat aqutissioritariaqartoq isumaqarfigigatigu siunnersuummut saqqummiussaqaarfigaarput.

Inatsisartut inatsisissaattut siunnersuut saqqummiunneqartoq inuit qinnuuloortussanngorlugit inissisimaannangilaq, kisiannili aamma aporfippassuarnik imaqarpoq ullutsinnut naleqqukkunnaavissimasunik ilaatigut naleqqussaariartoqarsimagluarpoq ullutsinnut naapertuutinngivissortumut.

Inui imminut namminersortut pilersortut pilersitsigit aammalu tunitsiviit siuarsartigit nunap inui periarfissarsiorsinnaanngorlugit aqutissiorfiginissaanut aaqqissuuseqqinnikkut uani qinnuteqarfigisinnaasutut innersuunneqartut pisariaqartitsineq naapertorlugu nammineersinnaasut sillimmaseqaraluartulluunniit mattunneqarsimallutik sulisunut sulerusuttunullu inatsisiliorata kikkut tamarmik piitsooqatigiinnissaanik iliuuseqartuarnerit qimallugit timitalersuisinnaasut aammalu periarfissarsiorsinnaasut imminut napatissinnaasut aqutissiorniartigit.

Neriuppugut inuit imminut pilersornerunissaanut aammalu siuariartortussanngorlugit aqutissioritariaqarneranut periarfissarsiornissamik oqariartuuteqarluta allannguutissatut siunnersuuterput ataatsimiititaliami ilanngullugu nalilersorneqassasoq.

Taamatut Naleqqamiit oqaaseqarluta allannguutissatut siunnersuuterput partiinit ilassilluarneqarluni ataatsimiititaliami ilanngullugu nalilersorluarneqarumaartoq. Nunap inui aningaasarsiornissaanut aqutissiuisa aporfii piiartigit nammineq pilersornerulernissaanut aqutissiuieqataasa Naalagaaffinngorniarpugut nunap inui nukittorsarlugit aporfii piiarlugit periarfissarsiortigit.

Qujanaq